



STINAPA TA INFORMA

NOS TESORO SKONDÍ

Pa un bishitante inkonsiente nos isla por parse seku i morto den temporada seku. Pero nos sí sa mihó! E suela di Boneiru pa un gran parti ta konsistí di piedra di kalki: esta fosil di koral. Anto p'esei tin hopi buraku, sker i espasio hòl den nos suela. I einan, bon skondí bou di superfisie di tera, tin un di e tesoronan mas balioso di Boneiru: awa dushi di suela. E tantísimo posnan riba na nos isla ta testimonio di esei. Studentenan di Vrije Universiteit di Amsterdam a kalkulá científicamente ku e stòk di awa den suela ta ser mantené na mesun nivel aña aden aña afó. Den temporada di áwaseru e áwaseru ta sak den suela. Dor ku esaki ta sosodé pokopoko e awa dushi ta keda drif riba e awa salu ku a penetrá for di laman, pasobra awa salu ta mas pisá ku awa dushi. E awa ta keda para den e burakunan den e kleps. Tur aña, segun e kálkulonon, sinku biaha e kantidat ku WEB ta produsí pa aña ta sak den suela. Pero ainda mas awa ta kore bai laman òf ta evaporá. P'esei ta hopi importante pa tene e awa mas tantu posibel riba tera. E ora ei e awa ta haña mas chèns pa sak den suela. Pero tampoko nos ke muchu molèster di e awa. P'esei mester regulá bon ta unda e awa ta keda para. E tereno kantu di Kaya Internashonal, patras di Lisa Gas i Auto City te na airopuerto ta un bon ehèmpel di esaki. Tur awa den besindario ta bin para akinan i ta haña chèns di sak den suela. Pues, ni maske kon inútil e tereno ei ta parse den temporada seku, e ta definitivamente di gran importansha! Un otro bon ehèmpel ta Saliña di Vlijt na banda di Kaya Amsterdam. E área aki tin komo otro kalidat di importansha ku pida tera i lodo chikitu ku a laba bin for di serunan por sak bai suela akinan. Di e manera aki ménos lodo i tera ta spula bai laman i nos refnan di koral ta keda mas salú. Pues nos mester ta hopi kuidadoso ku nos awa di suela. Di tempu di antaño nos tabata usa awa di pos pa agrikultura i pa awa di bebe pa bestia. I ku e téknikanan moderno no ta difísil pa hasi e awa bon pa bebe dor di ser humano. Pero nos tesoro skondí ta ser menasá. Dor ku e awa ta birando mas salu pa motibu ku nos ta permití awa di laman penetrá mas aden. Esaki ta lokual ta sosodiendo den e kanalnan dilanti di airopuerto. Pero tambe nos ta yenando e áreanan di 'buffer' ku sobrá di material di konstrukshon i greis, òf nos ta asta konstruí den nan. Lokual tampoko ta bon ta ku nos ta laga zeta bieu sak den suela. I tambe awa sushi di berpùt i awa polushoná di fábrikanan. Un otro problema ta ku ta pòmp saka muchu awa for di e posnan. Ta birando tempu pa nos protehá nos tesoro mihó. *Skirbi pa V. van Baronie, tradusí pa Marcel Nahr.*

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURESA



Traha huntu na un desaroyo duradero pa Boneiru